



**REPÚBLICA DEMOCRÁTICA DE TIMOR-LESTE
SECRETARIA DE ESTADO PARA A PROMOÇÃO DA IGUALDADE
GABINETE DA SECRETÁRIA DE ESTADO**

**Diskursu S.E. Sra. Idelta Maria Rodrigues,
Sekretária Estadu Promosaun Igualdade
Iha Okaziaun Abertura Uma Mahon MSS**

Maliana

2 Agustu 2012

Hato'ó husi Sr. Armando da Costa, Diretór Nasionál Dezenvolvimentu Polítika Jéneru

S.E. Sra. Ana Pessoa, Prokuradóra Jerál Repúblika
S.E. Sra. Maria Domingas Alves, Ministra Solidariedade Sosiál
S.E. Sr. Jacinto Rigoberto, Sekretáriu Estadu Asisténsia Sosiál
S.E. Sr. Sebastião Dias Ximenes, Provedór Direitu Umánu no Justísa
S.E. Sr. Silveiro Pinto, Vise Provedór Direitu Umánu no Justísa
S.E. Sr. Finn Rieske-Nielsen, Rerezentante Espesiál Sekretáriu Jerál ONU iha Timor-Leste
Reverendísimu Padre Pároku Maliana
Exmo. Sr. Eugênio João Amado de Maria Soares, Diretór Jerál
Exmo. Sr. Domingos Martins, Administradór Distritu Maliana
Distintu Konvidadu
Señora no Señor sira

Boa tarde bá ita hotu. Prazer bo'ot ida mai hau marka prezensa iha loron ohin iha inagurasaun Uma Mahon Maria Tapó iha Maliana ne'ebé Ministériu Solidariedade Sosiál mak harí.

Uluk nanain hau hakarak atu kongratula Ministériu Solidariedade Sosiál bá susesu ida ne'e.

MSS assume ninia responsabilidade haktuir Lei Kontra Violénsia Doméstika no Planu Asaun Nasionál kona-ba Violénsia bazeia bá Jéneru ne'ebé mak foin dau-daun aprova, ho seriedade, no kompromete a'an hodi asegura disponibilidade establesimentu Uma Mahon suficiente iha distritu ne'ebé mak agora dau-dauk ne'e servisu refere sei fraku. Ho nune'e bele kumpre nesiedade vítima violénsia bazeia bá jéneru no violénsia doméstika. Hau ho orgullu kongratula MSS iha nia esforsu hotu iha área refere no mós bá sira nia dedikasaun.

Hanesan ita hotu hatene, apoiu mai husi Uma Mahon, iha tempu **longo no curto prazo**, prezisa tebes iha Timor-Leste, partikularmente iha área rural. Estatística husi Peskiza

Demográfika Saúde husi 2010 hatudu katak samente 27% feto Timor-Leste depende bá membru família atu fornese hela fatin bá sira durante kalan hirak nia laran kuandu sira sai husi sira nia hela fatin tanba violénsia no menus liu – samente feto ida husi feto nain lima – bele depente bá sira nia família atu apoia sira finanseiramente se presiza.

Iha tinan hirak liu bá, governu servisu maka'as tebes atu rezolve problema falta apoiu refere. Lei Kontra Violénsia Doméstika, adopta iha tinan rua liu bá, define responsabilidade instituisaun governu, hanesan dever husi Ministériu Solidariedade Sosiál, atu estabelece rede nasional sentru apoiu kompostu husi sentru akollimentu no uma mahon bá sobrevivente sira.

Lei refere fó mandatu bá setór justisa atu asegura katak polísia intervén iha kazu violénsia doméstika no vítima sira hetan apoiu jurídiku. Lei ne'e mós ezije bá setór saúde atu fornese apoiu médiku espesializadu hodi bele atende vítima sira. Haktuir lei ne'e presiza mós rede referénsia kona-ba emerjénsia médika, assisténsia jurídika no psiko-sosiál.

Dever sira ne'e hotu haktuir Lei refléta ona iha Planu Asaun Nasionál kona-ba Violénsia bazeia bá Jéneru, aprova husi Konsellu Ministru iha 29 Maiu 2012. Esforsu para bele adopta Planu refere xefia husi Sekretaria Estadu Promosaun Igualdade, no rezultadu husi diskusaun fulan barak nia laran, deliberasaun no konsulta ho ajénsia governu, sociedade sivíl no parte interesada barak iha Díli no distritu sira. Planu ida ne'e hakbi'it governu atu kolabora hamutuk iha setór hotu hodi koalia kona-ba violénsia doméstika no violénsia bazeia bá jéneru. Inklui mós nesidade atu estabelese Fatin Hamkatek besik ho ospitál para vítima sira bele hetan asesu bá tratamentu médiku, akonsellamentu trauma no uma mahon temporária. Presiza mós número empregadu sosiál ne'ebé a'as, sensibilizasaun públiku jerál kona-ba ezisténsia no natureza apoiu servisu ne'ebé iha, no mós asesu maka'as bá fatin mahon, estabelese husi Estadu iha Maliana.

Planu Asaun Nasionál identifika objetivu **longo no curto prazo** bá tinan tolu oin mai no oinsa Ministériu Xave Governu nian sei servisu hamutuk atu bele alkansa objetivu refere. Plan refere deskreve área estratéjika atuasaun, esfera kolaborasaun mútua no mekanizmu mellorada koordinasaun ho foku iha área estratéjika tolu: Prevensaun Violénsia bazeia bá Jéneru; Provizaun Apoiu bá vítima; no asegura autor krime violénsia bazeia bá jéneru sira sei lori bá tribunál.

Hau kontente, depoisde fulan hitu wainihra Planu refere ofisialmente komesa, implementasaun Planu refere lao tiha ona. Apoiu Fatin Hakmatek foun estabelese ona Ospitál Rejionál Oecusse iha Fevereiru no Fatin Hakmatek seluk mós sei konstrui hela iha Suai no Maliana.

Primeiru grupu empregadu assisténsia saúde Timor-Leste pasa ona treinamentu hetan apoia husi Ministériu Saúde kona-ba utilizasaun Protokolu Forensik Médiku iha Abril. Grupu hirak ne'e akreditadu tiha ona no bele halao ezaminasaun forensik médiku. Neduni evidénsia física kazu violénsia bazeia bá jéneru bele hetan dokumentasaun no haruka bá Gabinete Prokuradoria.

Formasaun Investigasaun Violénsia bazeia bá Jéneru estende ona bá membru PNTL hanesan Task Force no Polísia Komunitária no Diresaun Nasionál Prizaun iha Ministériu Justisa.

Pasu tuir mai mak implementasaun Planu Asaun Nasionál kona-ba Violénsia bazeia bá Jéneru krusiál tebes. SEPI hamutuk ho Ministériu Solidariedade Sosiál sei sai parte husi Komisaun Interministeriál ne'ebé estabelese nudar entidade koordinasaun no, hamutuk ho membru seluk hanesan husi Ministériu Justisa, Edukasaun, Saúde, Sekretariadu Seguransa Sivíl, Gabinete Provedoria Direitu Umánu no Justisa no representante sociedade sivíl, komisaun refere sei

superviziona implementasaun Planu Asaun Nasionál. Komisaun refere mós sei hato'o relatóriu kona-ba progresu ne'ebé halao ona durante tinan tomak iha ninia Relatóriu Anuál bá Parlamentu.

Ita nia governu foti ona medida konkreta atu resolve problema imediatu nesesidade sobrevivente violénsia doméstika no violénsia bazeia bá jéneru iha ita nia nasaun. Ita iha rekursu umánu ne'ebé limitadu no ita nia infra-estrutura presiza fortifikasaun. Ita nia Planu Asaun Nasionál kona-ba Violénsia bazeia bá Jéneru nia objetivu atu fornese **roadmap** bá oin.

Iha SEPI, ami fornese advokasia relasiona ho orsamentu sensível bá jéneru iha nível altu governu nian no kada tinan, halao análise jéneru relasiona ho Orsamentu Estadu, partikularmente, alokasaun orsamentu kona-ba prevensaun, protesau no fornimentu apoiu atu halakon violénsia bazeia bá jéneru. Iha tinan ne'e no tinan mai ami sei halao nafatin atu asegura katak Planu Asaun Nasionál hetan rekursu suficiente atu implementa ninia atividade sira.

Planu ida ne'e pretense bá governu, sociedade sivil no mós bá ita nia comunidade hotu. Tanba Planu refere aprova ona, ita hotu tenke preparadu atu asume ita nia responsabilidade haktuir ita ida-idak nia mandatu, atu servisu hamutuk iha tinan tolu mai, laos deit atu kombate, maibé atu elimina forma oin-oin violénsia bazeia bá jéneru iha ita nia sociedade.

Iha hau nia lia fuan ikus iha loron importante ida ne'e, hau lembra katak durante ita nia istória tomak, fetu Timor-Leste, hanesan Maria Tapó, ne'ebé uma mahon ne'e hanaran tuir nia, asume ona papel nudar kombatente rezisténsia, ativista no defensora bá paz. Sira demonstra ona korajen bo'ot no determinasaun, fornese lideransa no, to'o ohin loron, continua halao papel krusiál iha rekonstrusaun comunidade ne'ebé seguru iha ita nia nasaun. Tapó nia vida no vida husi fetu Timor-Leste barak sai nudar inspirasaun bá ita hotu no tanba sira, ita tenke luta maka'as atu elimina violénsia doméstika husi ita nia sociedade para sempre.

Hanesan hau fó sai ona iha okaziaun barak, violénsia doméstika ita labele rezolve mesak deit, ka liu husi instituisaun ka setór ida. Ida ne'e tenke sai nudar responsabilidade ita hotu nian.

Dala ida tan, hau hato'o hau nia kongratulasaun bá Ministériu Solidariedade Sosiál bá traballu **bem-feito**.

Obrigada.